



A MADÒNNA DA FORTUNN-A

di Isabella Descalzo

Inta gexa di Santi Vittore e Carlo, in stradda Balbi, gh'è in quaddro ben ben interessante: o raprezenta a stöia da Madònna da Fortunn-a, ch'a l'è questa.

A-i 17 de zenâ do 1636 'na bufera spaventoza a l'àiva investio pe de oe o pòrto de Zena e fracasòu tutte e nave che gh'ea drento.

O giorno dòppo, in mezo a-i rotammi, galezava 'na grande statoa de legno, 'na Madònna co-o Banbin in còllo e o rozaiò. A l'ea a polena de unn-a de nave destrute, 'na nave irlandeize, e onde e o vento l'àivan sbatua contra i meu ma a no s'ea rotta e, pe miâcoo, a l'ea intrâ sann-a inta darsena, sciben che 'n galeon n'atapava l'imbocatua.

Doi mainæ êan anæti a ricuperala e l'àivan portâ inte 'n magazin di Lömelin, e chi a l'àiva fæto a primma graçia: 'na figetta chéita dai cen èrti do palasso a diva d'ese stæta pigiâ in brasso da quella Scignoia vestia de celèste e pösâ sann-a e sarva in tæra.

Aloa i zeneixi, in solenne procescion, àivan portòu a statoa inta vixinn-a gexa de San Vitò e lè a s'ea scistemâ da sola inta sò niccia, con gran mâveggia e devoçion di prezzenti.

Do 1799 a statoa a l'è stæta portâ inta gexa de San Carlo (San Vitò a l'è stæta pöi sconscrâ e demolia), e òua a l'è lì, in sce l'artâ magiò.

O quaddro o l'è interessante pe-i particolari: se vedde a darsena, con l'intrata sormontâ da-o stemma de Zena; gh'è a nòstra bèlla Lanterna e in ato a gexa de San Benigno; se leze i nommi de barche di doi mainæ, *Merlo Padre e Barca – Figlio del Merlo*; in camallo o l'areze in scê spalle 'na cascia con scritto l'anno de l'avenimento, 1636.

